

CINQVIESME
FACTVM,

POVR MESSIRE
PHILIPPES

DE LA

MOTHE-HOVDANCOVRT
DVC DE CARDONE

ET

MARESCHAL DE FRANCE.

CONTENANT LES INIVSTES ET
extraordinaires procedures faites contre luy,
par les artifices du Cardinal Mazarin.



A PARIS,

Chez FRANÇOIS NOEL, rue Saint Iacques, aux Colomnes
d'Hercules.

M. DC. XLIX.

Avec Permission.



CINQVIESME FACTVM,

Pour Messire Philippes de la Mothe-Houdancourt, Duc de Cardone, & Marechal de France.

Contenant les iniustes & extraordinaires procedures faites contre luy, par les artifices du Cardinal Mazarin.



LE Conseil de Monsieur le Marechal de la Mothe auoit tousiours iusques icy differé de publier ce dernier Factum; sur l'esperance que monsieur le Cardinal Mazarin, Autheur de tant d'iniustices se changeroit: & aussi sur la crainte qu'ayant vsurpé tout le pouuoir dans le gouvernement du Royaume, il ne con-

tinuast à trauerser la liberté dudit seigneur Marechal, lors qu'il eust veu tant de veritez descouuertes. Pour semblable raison le mesme Conseil n'a voulu au secôd Factum rien toucher des campagnes faites en Catalogne és années 1643. & 1644. dautant que ledit Catdinal est la cause originale des mal-heurs qui y sont arriuez: & dans les autres Factums, comme si ledit Conseil eust voulu flatter ledit Cardinal, il s'est contenté de dire, qu'il auoit esté surpris par les Ennemis dudit seigneur Marechal.

Mais auiourd'huy qu'il continuë en sa mauuaise volonté. & qu'on a veu depuis peu afficher à Paris & à S. Germain vn placard calomnieux; dans lequel la flatterie, qui n'abâdonne iamais les puissances qui regnent dâs la Cour des Roys, a eu l'audace de vouloir faire croire, que sans la douceur dont à vse ledit Cardinal enuers Monsieur le Marechal de la Mo-

the, il ne seroit pas maintenant en estat de seruir la France dans Paris. Le Conseil a trouué cette vanité trop iniurieuse, pour differer dauantage la publication de ce cinquiesme Factum, afin de faire connoistre la fousseté de ce Libelle; & que bien au contraire de cette pretenduë douceur, le Cardinal a usé enuers luy de toutes les rigueurs possibles; & que mesme par ses artifices il a enuelopé dans la ruine de ce Gentilhomme, celle de l'Estat: ayant fait manquer les plus belles occasions qu'eut iamais la France sur l'Espagne, lesquelles nous eussent indubitablement donné cette Paix Generale tant desirée de tous les bons peuples. Ceux qui aux siecles aduenir liront l'Histoire de nostre temps, pleureront la perte de ce moment, qu'on est obligé de représenter.

Le feu Roy de tres glorieuse memoire, ayant expérimenté par tant de guerres qu'il a soustenuës, que la conqueste de quelques Villes du costé de Flandres, ny les heureux succez arriuez en Allemagne & en Italie, ne pouuoient reduire le Roy Catholique à vouloir la paix, se resolut enfin de l'attaquer fortement du costé des Espagnes. A cét effet ce grand Prince, quoy que valetudinaire y marcha en personne, & sa presence aux sieges de Colioure & de Perpignan, acheua la conqueste du Roussillon.

En la Campagne suiuite, sa Maiesté continuant dans la resolution de forcer l'Espagnol à vouloir la paix, fit peu de temps auant sa mort passer en Catalogne par les soins de Monsieur de Noyers, la plus puissante armée Françoisse qui ait esté veuë de nostre temps au delà des Pirenées. L'Espagne n'estoit a lors en estat de resister à tant de forces; Elle n'auoit aucunes sur pied, elle estoit encore toute estonnée & abatuë des prises de Perpignan, Colioure & Mouçon, & de trois batailles perduës en Catalogne l'an 1642. dont la dernière luy auoit causé la dissipation d'une armée de trente mille hommes, que l'Espagne auoit leuëe pour vn dernier effort, qui fut ruinée comme en presence de sa Maiesté Catholique & dont les restes furent depuis deffaits à la iournée de Miranet qui cōmença la Campagne de 1643. Et ce qui reduisoit le
 Roy

5

Roy Catholique dans l'impuissance de pouuoir dresser nouvelles armées; estoit que tous les meilleurs Officiers restoiēt prisonniers en France, & n'auoit pas encore eu le temps d'en faire venir d'autres des pays Estrangers.

Dans cette fauorable conioncture, le Roy commit l'exécution de ce grand dessein, qui nous eust donné la Paix, à Mōsieur le Marechal de la Mothe. Il estoit alors Viceroy de Catalogne, ou depuis trois ans, nonobstant les desordres de la guerre, il auoit gouverné les peuples cōme s'ils eussent esté en paix: & ce avec tant de iustice & de douceur, que leurs voisins d'Arragon, & de Vallence, voyant la felicité de la domination Françoisē, auoient pris resolution de changer de Maistre: iusques-là que les habitans de Sarragosse, voyant leur Roy s'en retourne à Madrid, luy protesterent ouuertement; que si en son absence le Marechal de la Mothe passoit la riuere de Cinca, ils ne pouuoient faire autrement que de luy porter les clefs de leur ville. Ledit sieur Marechal par vn cours continuel de victoires qu'il auoit obtenues, estoit alors en si haute reputation par toutes les Espagnes que sō seul nom y portoit la terreur, en sorte qu'ō a souuēt entēdu dire à sa Maiesté Catolique, qu'elle estoit en peine de trouuer quelque Mōtagne pour opposer à cette Montee.

Ce que ce puissant Monarque n'auoit peu rencontrer dans la vaste estēdue de ses Estats, il le trouua au Cardinal Mazarain son Subiet, qui s'estoit fourré dās la directiō absolue des affaires de Frāce: lequel abusant de l'autorité que luy auoit commise la meilleure Princeesse du monde, estima par iene sçay quelle politique inconnue à d'autres qu'à luy, qu'il falloit ruiner ce grand effort preparé du costé de l'Espagne: soit à cause que ses inclinations ont tousiours eu la pente du costé de sa naissance, & de son education: soit aussi qu'il apprehendoit que les bons succes du costé de l'Espagne aduançassent la paix, pendant laquelle il iugeoit quelque diminution de son credit: il se peut aussi qu'il l'ait fait, afin d'empescher que Monsieur le Marechal de la Mothe ne vint à ce hant point de gloire, d'auoir par ces heureux succez obligé le

roy Catholique à la Paix: apres laquelle il eust peu mesnager le retour de Monsieur de Noyers son parent & amy, dans les affaires, retour que le Cardinal a tousiours principalement apprehendé.

Quelque raison que puisse alleguer le Cardinal, il est constant que cette puissante armée, que le feu Roy auoit fait passer en Espagne, est perie sans pouuoir rien faire: & que ce malheur est arriué par sa faute, ou par sa malice: car encores qu'il ait vsé de mille artifices pour s'en discoulper, sa conduite y a assez paru pour n'en douter pas. Il n'osa pas d'abord faire repasser l'armée en France, d'autant qu'un chacun eust crié contre son nouueau ministre; & comme il est le plus artificieux de tous les hommes à cacher ses defauts, il trouua vn moyen moins esclatât qu'il fit manier par tant de mains, qu'il creut qu'aucun ne l'en oseroit vray-semblablement soupçonner. Il sçauoit que pour passer aux Royaumes d'Arragon & de Valence, il y a quelques pays sterile, où il y faut porter des viures, qu'on ne peut auoir sans argent; Il sçauoit bien qu'en Catalogne, comme en Hollande. les Soldats ne peuuent sortir de leurs quartiers pour marcher en campagne sans auoir prealablement payé leurs hostes: & ainsi que le nerf de la guerre manquant, quelque puissante que fust l'armée, elle demeureroit inutile.

Afin qu'elle se peust ruiner d'elle-mesme, comme insensiblement, apres que le Cardinal eut fait diuertir les fonds que M. de Noyers auoit destineez par l'ordre du feu Roy, il fit seblât de tesmoigner en public de la chaleur à vouloir que l'armée de Catalogne ne manquast de rien; à cét effect il fit bailler pour toutes les sommes qui luy estoient necessaires, des assignations & des lettres d'eschange par Montauron. Mais, ô fourberie sans exemple! il se trouua que les assignations auoient desia esté données à d'autres, & que toutes les lettres d'eschange furent protestées: Ce qui empescha l'armée de se pouuoir mettre en estat d'agir; seulement Monsieur le Marechal de la Mothe, apres auoir emprunté quelques deniers des habitans de Barcelone, fist sortir des quartiers quatre à

cinq mille hommes, avec lesquels il entra foiblement dans le Comté de Ribagorze, d'où il fut contraint de se retirer, faute de pain.

M. le Cardin. quelque artificieux qu'il puisse estre ne se peut excuser de ce grand manquement. S'y agissant de l'entretien d'une armée importante, il n'y a Sur-Intendant ny Secretaire d'Estat, qui oſast l'auoir entrepris sans ses ordres. Ces Messieurs donnent quelquesfois semblables rescriptions & assignations à quelque pensionnaire importun, pour se redimer de ses importunitéz. Mais on ne doit point payer en pareille monnoye les armées, dans la subsistance desquelles consiste la grandeur des Estats, le repos des peuples. Pour moindre suiet François I. fit pendre le sieur de Semblancé, qui auoit par l'ordre de Madame Louïse de Sauoye mere du Roy, diuertý le fonds destiné à l'armée que commandoit en Italie Monsieur de Lautrec. Et ce qui fait presumer que le Cardinal a esté autheur de la fourbe, est que les Ordonnateurs & Montauron n'en ont point esté recherchez, & sont demeurez impunis.

On peut facilement croire, qu'un General, homme de cœur, ne peut les bras croisez, voir perir entre ses mains vne puissante armée par la faute d'autrui, sans se plaindre. En cét accident la douleur ne peut estre que tresensible. Monsieur le Marechal de la Mothe (qui ne se promettoit pas moins pendant cette campagne que la conqueste de deux Royaumes) en parla hautement. Il se plaignit à la Cour de cét abandonnement, & demanda que pour le bien des affaires du Roy, on donnast à la Catalogne vn autre Secretaire d'Estat que Monsieur le Tellier, qui est creature du Cardinal, lequel prenant cette plainte pour affront, eut l'astuce de vouloir persuader à la Reyne Regente que le Marechal faisoit telles plaintes non contr'eux, mais pour faire blasmer le gouuernement de sa Maïesté, & voila le crime secret par lequel ils ont surpris la bonté de la Reyne, & du depuis tant persecuté ledit Seigneur Marechal.

Il fallut enfin par honneur, que le Cardinal enuoyast

quelque argent en Catalogne; il le fit sur la fin du mois d'Aoust; mais avec cette precaution, qu'en mesme temps qu'il fortifioit l'armée par ces secours trop tard arriué, il la diminuoit par ailleurs. Car comme s'il eust eu apprehension que Monsieur le Marechal de la Mothe ayant de l'argent n'entreprist encore quelque chose de grand sur la fin de la Campagne; il luy fit donner les ordres par courier exprés, de renvoyer en France les Regimens d'Anguyen & de Conty; & de plus, casser & licentier plusieurs autres Regimens de Cavalerie. & d'Infanterie, ce qui affoiblit entieremēt l'armée Françoisē: Il arriua encore qu'en mesme temps M. le Cardinal fit eschāger avec nos prisonniers faits en la bataille d'Honnecour, ce grand nombre d'officiers Castillans que M. le Marechal de la Mothe auoit pris es iournées de Villefranche & de Miranet, tellement que l'Ennemy fortifié des hommes qui luy manquoient, leua sur la fin de la Campagne, vne nouvelle armée avec laquelle il assiegea & reprit Mouçon.

Cependant le Roy Catholique prenant l'occasion de tant de manemens, tramoit des pratiques & menées pour faire reuolter la Catalogne: il fit ietter des billets dās Barcelone & autre villes du Principat, par lesquels au nom de Sainte Eulalie. & des autres Saints Parrōs du Pays; Il exhortoit les Catalans de retourner dans son obeyssance, leur promettant Amnistie de tout le passé: & leur disant qu'ils pouuoient bien voir que sa maiesté estoit d'accord avec la Cour de France, & eux abandonnez d'icelle; par le peu de secours qu'on auoit euoyé depuis la mort du Roy au Marechal de la Mothe. C'est au Cardinal à se lauer de cette intelligence, estant assez visible qu'en ces occurrences, & en beaucoup d'autres, il a vtilement seruy l'Espagne.

Et ce qui doit fortifier le doute qu'il en a eu le dessein, est la louange affectée que donne au Cardinal ce pretre du Libelle ou Placard, en l'exaltant cōme vn hōme si elloigné de son interest, qu'on ne les void point acquerir de terres, charges, maisons, ny gouuernemēs, cōme ont fait les autres Ministres, & Fauoris qui l'ont precedé. Mais bien loin de l'intention de
tels

9

telles flatteries, on peut dire avec verité, que toute cette fa-
çon d'agir est vn tesmoignage certain qu'il na'yme pas la
France, puis qu'il ne s'y attache pas: Au contraire, il vend ce
qu'il y a, faisant argent de tout. On luy a veu la charge de
Sur-Intendant des Bastimens, & il la vendue. Il a vendu le
Controlle General des Finances, & la Capitainerie & Gou-
uernement de Fontaine-bleau: il cherche maintenant
quelque autre, qui luy achepste la Conciergerie du mes-
me lieu. Et encore qu'il soit d'une humeur extremement
auare, il a ses Benefices comme indifferents; Il en a voulu
donner des plus importants à Monseigneur le Cardinal de
Lyon qui les a genereusement refusez: on sçait à qui il auoit
baillé l'Abbaye de Corbie, & depuis peu l'Abbaye de Moif-
fac pour adiufter le procez de celle du Toronet. On le void
tous les iours par de fausses generositez, cōstituer & consen-
tir des pensions sur ses benefices pour des personnes indiffe-
rentes. Toutes actions extraordinaires qui monstrent qu'il a
d'autres pensées que de s'habituer en France: la maison mes-
me qu'il bastist & habite n'est pas à luy, il n'y a aucuns meu-
bles ny prouisions, que les marchands ou pouruoyeurs ne se
vendiquēt. Il faudroit estre sans iugement de voir vn Estran-
ger amasser dans se Royaume des millions qu'il enuoye en
pays neutres, & ne pas croire qu'il n'ait intention d'en for-
tir, & de se mettre en estat de choisir tel party des deux Cou-
ronnes qu'il luy plaira.

La Politique de Monsieur le Cardinal se contenta en la
Campagne de 1643. de rendre M. le Marechal de la Mothe
inutile. Et la suiuite 1644. passant plus auant elle le voulut
faire malheureux: pour y paruenir, elle luy suscita des Enne-
mis, luy fit denier toutes faueurs, & tascha à le decrediter en
Catalogne, & dans l'armée qu'il commandoit. Ce peut il
voir menterie plus raffinée, que d'entendre le Cardinal dire
aux Officiers qui auoient esté reformez en son armée: que
c'estoit le Marechal qui les auoit cassez de son autorité,
encore que c'eust esté par les ordres précis que luy-mesme
auoit enuoyez de la Cour. De faueurs il n'en a receu aucunes

Depuis le Ministeriat du Cardinal, il ne se trouuera point d'as les compres de l'Espagne, qu'il ait touché vne seule gratification, cōme les autres Generaux d'Armée: n'ayāt pas mesme esté payé deses pensions & apointemēs de Marechal de France. Au contraire on luy a regréte sur la rançon du Marquis de Pouare, de laquelle le feu Roy l'auoit gratifié en recompense d'une bataille gagnée. Et depuis Mōsieur de Vaubecour ayant fait en sa faue & vne demission du Gouuernement de Parpignan, les prouisions luy en furent refusées; encore que le feu Roy l'eust agréé, & que ses victoires eussent beaucoup seruy à la prise & conseruation de cette place.

Monsieur le Marechal ne se veut pas plaindre de ces refus, d'autant qu'encore qu'il eust quelque iustice, ils despendoiēt de la grace du Prince: mais il se peut legitiment plaindre des choses refusées en intention de le decrediter, cela ayant beaucoup aydé à ruiner le seruice du Roy d'as l'armée; & dans vne Prouince Estrangere qu'il gouuernoit. Selon les constitutions de Catalogne, les Viceroy presentent au Roy pour les Benefices, & pour les Charges, trois personnes, desquelles le Roy laisse faire choix au Viceroy, & iamais les Roys de Castille, ny d'Arragon, n'ont esté contre ce priuilege, M. le Cardinal depuis son Ministere en a tousiours fait elire d'autres que ceux qui estoient presentez par M. de la Mothe Viceroy. Et les recommandations qu'il faisoit à Messieurs les Ministres pour les Officiers de l'armée, qu'il iugeoit dignes de seruir, leur estoit vne exclusion asseurée; tellement que les François & Catalans retournant de France, disoient hautement que pour ruiner vne affaire à la Cour il falloit prier le Viceroy de la recommander.

Le mespris le plus insupportable de tous, fut au commencement de cette derniere Campagne, que le Cardinal ayant gagné quelques Officiers Maieurs de l'Armée de Catalogne, Monsieur le Tellier par son ordre leur escriuoit Lettres de Cachet au nom du Roy, ne faisant plus scauoir aucunes nouuelles à l'Armée que par leur bouche: ce qui leur faisant presumer estre dans les secrets du cabinet, & ainsi

auoir plus de credit que leur General, chacun d'eux commen-
ça à trancher du maistre, & de là vinrent les diuisions & desobeyssances, qui causerent en Catalogne partie des mauuais
sucez de cette Campagne. Monsieur le Marechal de la Mo-
the les preuoyant, il demanda instamment vn Lieutenant
General, ce qui fut formellement empesché par Monsieur le
Cardinal, qui ne tendoit qu'à luy trouuer des contredisans,
afin d'apporter la confusion à tous les desseins.

Vne rupture de Traitté pour les recreuës, a encore grande-
ment contribué à ces malheurs, Monsieur le Marechal de la
Mothe voulant remplacer les troupes qu'on luy auoit ostées
la precedente Campagne, auoit traité avec ses Officiers de
Caualerie, que moyennant quatre mille liures, chacun d'eux
tiendroient sa Compagnie complete de soixante hommes en
Catalogne dans la fin de Mars. Monsieur le Cardinal fit rom-
pre ce Traitté par Monsieur le Tellier, qui se contenta que les-
dits Officiers fissent leurs Compagnies de cinquante hom-
mes dans la fin d'Avril, moyennant mil escus qu'il leur fit or-
donner, & mal payer; De ces deux manquemens derniers
sont prouenus tous les desordres qui suiurent. En ce que les
Officiers ayant eu terme iusques à la fin d'Avril pour leur re-
creuës, peu d'entre eux estoient encore arriuez le 15. de May,
que fut le combat de Leyde. Absence qui causa la perte de la
Bataille, ioint la desobeyssance & lascheté de la plus grande
part de ceux qui y estoient; lesquels se retirerent sans comba-
tre, abandonnant leur General & toute l'Infanterie à la mer-
cy des Ennemis: & au lieu d'en faire punition exemplaire,
Monsieur le Cardinal en a recompensé le commandant de la
Caualerie par des gratifications secretes la premiere année, &
par des emplois signalez, les suiuanes.

Monsieur le Cardinal s'est tellement rendu ingenieux, à
vouloir faire Monsieur le Marechal de la Mothe cause de la
perte de cette bataille; que son Conseil se trouue obligé
d'en représenter des esclaircissements qui se voyent aux in-
formations qui en ont esté faites en la Catalogne. Dès la fin
d'Avril, D. Philippes de Silves General de l'Armée Enne-

mie pressé par la presence du Roy d'Espagne arriuè en mesme temps à Saragosse, se mit en campagne: & apres auoir fait pendant quelques iours, plusieurs feintes de vouloir attaquer Flix ou Balaguer, se vint finalement camper deuant la ville de Lerida. Dés auparauant Monsieur le Marechal de la Mothe auoit enuoyé le sieur de Boissat avec sa Caualerie, pour empescher les Ennemis de passer la Segre; Balthasar s'offroit de le faire avec son Regiment, & cinq cens cheuaux qu'il demanda, ce que ledit sieur de Boissat luy refusa, respondant qu'il eust desiré les Ennemis desia tous passez au deça de la riuiere, afin que la gloire de leur deffaite en peust estre plus grande.

Monsieur le Marechal ayant receu en mesme temps trois mille hommes de pied de ses recreuës nouuellement débarquées à Barcelone, marcha en diligence pour ietter du secours dans Leyde, auparauant que les Ennemis eussent peu acheuer leurs retranchemens. Ayant ioint à Ceruere sa Caualerie & Infanterie, avec la garnison qu'il auoit retirée de Balaguer il alla droit à Leyde; aux aproches il deffit huit cens hommes des postes aduancez, lesquels allerent ietter l'espouuante dans leur Camp. Il vouloit poursuiure sa pointe sur l'aduis certain qu'il receut que le pont de batteaux des Ennemis n'estoit acheué, & qu'ainsi il defferoit facilement ceux qui estoient desia passé au deça de la riuiere.

Il fut oppose en son dessein, quoy qu'il fut selon les regles de la guerre, par ses principaux Officiers; qui luy declarerent ne se pouoir presenter aux ennemis sans canon; selon la pluralité des aduis, il le fallut attendre: il tarda quatre heures, pendant lesquelles le pont fut acheué: en sorte qu'à son arriuée il trouua les Ennemis en bataille au deça de la Segre. Il n'y auoit plus moyen de se retirer; ny aussi d'entrer dans Leyde sans diffiler: ce qui eust esté perilleux à la veuë de l'Armée Ennemie, & qui fit resoudre Monsieur le Marechal de la Mothe à la bataille; avec toutes les apparences d'heureux succès: Les Officiers qui le contredisoient en tout autre chose,

en furent mesmes d'aduis ; toute l'armée estoit en allegresse, attendant avec impatience l'heure & le temps du cōbat ; nous auions l'aduantage du lieu , & iamais Monsieur le Marechal n'auoit combattu les Espagnols avec des forces tantégales: Nostre canon les foudroyoit, & les obligea à venir à nous à la desesperade: Nostre Infanterie & Artillerie y firent merueilles, & M. de la Mothe de son costé renuersa laisse gauche qu'il reduisit à demāder quartier, & nos gens crioient victoire, lors que seize cens cheuaux opposez à l'aisle droicte conduits par Boissat Marechal de Camp se retirerent sans combattre, pas à pas, sans estre suiuis des Ennemis ; ce qui a fait soupçonner aux Catalans & à d'autres qu'il y auoit intelligence.

Ce fut icy la premiere disgrace qu'ait iamais eue dans les combats Monsieur les Marechal de la Mothe ; il auoit assisté en cent autres , & auoit luy mesme gagné six batailles, qui auoient tellement confirmé cette haute reputation qu'il a acquise, que la perte de celle-cy ne la diminua aucunement. Et de verité, il y tesmoigna qu'il auoit la force de porter la bonne & mauuaise fortune avec vne grande egalité d'esprit. Car se voyant abandonné, & la Bataille sans ressource, il ne desespera pas encore de faire l'effect pour lequel il estoit venu, c'est à dire, de secourir la ville assiegée : & comme il a tousiours eu, autant que Capitaine du monde, le iugement present parmy les dangers, il trouua dans l'occasion le moyen de l'executer. Il considera que les Ennemis s'arrestant au pillage de son camp il auroit le temps de reuoir partie de son Infanterie, & la faire aller dans les iardins de Leyde : il se met à la teste d'une partie, & luy conduisit, d'où sans aucune difficulté le Cheualier de la Valliere les mena dans la Ville, & apres qu'il les eust veu passer le pont, il se retira luy quinziemes à Ceruere, pour mettre ordre au reste de la Prouince. Par ce secours la garnison se trouua de quatre mille hommes & Dom Philippes de Silua ne l'osa plus attaquer de force : ainsi vne place qui auroit esté emportée en huit iours fut capable

de soustenir plus de trois mois de siege, & eust tenu encore davantage sans les fautes du Gouverneur.

Les Catalans eurent en plus grande estime Monsieur le Marechal de la Mothe, qu'ils n'auoient auparauant cette action, laquelle ils comparoient aux plus belles des anciens Capitaines : y ayant peu d'exemples qu'apres vne bataille perduë, aucun ait executé avec ordre l'effet pour lequel elle auoit esté donnée. De plus qu'apres s'estre retiré, il soit avec le debris de son armée, de nouveau venu r'affronter les ennemis victorieux, & leur presenter vne secõde bataille, avec vne contenance si resoluë qu'il n'oserent sortir de leurs retranchemës. Refus qui obligea Monsieur le Marechal de la Mothe à se cacher en des lieux, d'où il pouuoit incommoder les assiegeans. Il les fatigua par des alarmes & des combats continuels, il leur prit souuent des conuois, deffit nôbre de secours qui venoient en leur Camp. Et tout cela comme en presence du Roy Catholique qui estoit à Fragues, quatre lieuës de Leyde; continuant la guerre en sorte, qu'il se trouuera peu de Villes prises qui ayent tant cousté à l'Espagne, qui pourra mettre cette victoire entre les Cadmeenes, ayant esté pendant le siege obligé de renouveler l'armée par deux fois.

Monsieur le Marechal de la Mothe eust encore secouru la place, si les ordres precis de Monsieur le Cardinal ne l'en eussent empesché en deux occasions. La premiere vn mois apres la bataille qu'il le voulut tenter apres que les Regimens de Champagne & de la Marine l'eurent ioinct, avec les milices de Catalogne; tellement que l'armé se trouuoit assez nombreuse pour tout entreprendre. L'Ennemy estoit estonné de nostre resolution, sa circonuallation n'estant du tout acheuee : nous auions encore le fort Gardin qui nous en facilitoit l'executiõ. Les principaux Officiers s'opposèrent à cette glorieuse entreprise & pour les autoriser en leur opinion, Monsieur de Beauuais Plessian enuoyé par Monsieur le Cardinal monstra les ordres de la Cour, signez le Tellier, par lesquels il estoit expressement deffendu, de tenter le secours de la place, ius-

ques à l'arriuée des troupes qu'amenoit de France Monsieur le Marquis de Villeroy. Monsieur le Marechal de la Mothe fut contraint d'en passer par là, quoy qu'il remonstroit que ce secours seroit long à venir, & que cependant l'Ennemy acheuroit ses retranchemens, & prendroit Gardin: que le secours qu'on faisoit esperer venant de Lion, seroit si foible à son arriuée, qu'il ne suppleroit pas aux troupes que l'armée qui estoit assez forte auroit perdu en l'attendant. Predictiō veritable, car lors de la ionctiō l'armée se trouua moindre qu'elle n'estoit lors de l'occasion perduë. Et depuis ce secours arriué, Monsieur le Marechal ayant voulu pour la seconde fois attaquer les lignes, Monsieur de Castelan enuoyé par M. le Cardinal, ne le iugea pas à propos: Et en donnant le change, dist que l'aduis de son Eminence estoit pour compenser la perte de Leyde, d'assieger Roses ou Terragone, pourquoy on promettoit enuoyer par mer six mille hommes qu'on auoit pris du licentiaement de l'armée des Princes d'Italie, apres la paix du Duc de Parme.

Monsieur le Marechal de la Mothe, iugea l'entreprise de Terragone plus à propos: d'abord il attaqua le Mole par mer & par terre, & l'emporta par le plus effroyable assaut qui ait esté donné dans toutes les guerres de ce siecle: y ayant eu de part & d'autres, plus de huiet mille coups de canon tirez en deux heures. La prise de la Ville estoit indubitable apres ce grand exploit, si Monsieur le Cardinal eust enuoyé les six mille hommes qu'il auoit promis. Il les fit demeurer en Italie, sous pretexte de la mort du Pape Urbain; les y iugeant plus necessaires, pour fauoriser dans le Cōclaue l'eslection de Monseigneur le Card. Sachetti son amy, comme s'il eust esté permis de mesler les armes dans l'electiō du Chef de l'Eglise: Neantmoins cette vision a cousté à la France la perte de Terragone: car lors que Monsieur le Tellier enuoya vn courier pour donner aduis que ce secours demeueroit en Italie, il ne restoit pas au siege deux mille hommes de pied: & les Marechaux de Camp continuant en leur bonne intelligence y agis-

soient en sorte, que ce qu'un d'eux aduançoit en vne iournée, estoit le lendemain ruiné, par la ialousie de l'autre. Cependant le Roy & le Prince d'Espagne, estât arriuez à Leyde avec dix mille hommes, les Catalans apprehendant vne irruption dans le pays, prièrent Monsieur de la Mothe d'abandonner Terragone pour s'y opposer, comme il fit avec sa Caualerie qu'il auoit laissée dans la plaine d'Vrgel.

Toutel'Europe parla diuersement de la cause de tels succez arriuez en Catalogne pendant ces deux Cāpagnes. Les François & les Estrangers non interessez avec ceux qui desiroient la paix les penetrerent facilement; les Ennemis les descoururent par leurs billets & placards; & les Catalãs qui en estoient les tesmoins oculaires, disoient hautement que Monsieur le Marechal de la Mothe y auoit payé de sa personne, & qu'il eust porté les armes de France bien auant, si on luy eust enuoyé à temps, les choses necessaires & promesses. En la Cour de France, les adherans & partisans de Monsieur le Cardinal fermoient la bouche à ceux qui en vouloiēt veritablement parler; publiant des choses inuentées & ridicules contre Mondit sieur le Marechal de la Mothe, iusques là de dire, que s'il eust voulu, il eust pû faire le Roy d'Espagne prisonnier.

Monsieur le Cardinal apprehendant des plaintes publiques contre son ministere, y proceda d'une autre façon: Et comme il pratique exactement cette politique, de s'attribuer la gloire de toutes les choses bien faites, encore qu'elles soient fortuites, & qu'il n'ait participé ny dans les conseils, ny dans l'execution. Il reiette aussi sur les autres les causes de eueneemens qui ont mal reüssi. On le voit abuser en sorte de la bonté de la Reyne Regente, qu'il luy fait boire mesme ce calice; en ce que contre l'ordinaire des bons Ministres & Seruiteurs il s'attribuë l'honneur des graces & bien-faits, & reiette sur sa Maiesté les refus & mescontentemens.

Or afin de s'excuser de tant de desordres arriuez en l'armée de Catalogne, il fit que la Reyne Regente escriuit en
forme

forme de Manifeste, aux deputez du Principat de Catalogne vne longue lettre, dans laquelle sa Maiefté representoit les secours d'hommes & d'argent qui leur auoient esté enuoyez depuis sa Regence. M. le Tellier, creature de son Eminence, y fit l'addition d'un petit discours ou commentaire, dans lequel il mettoit le detail des choses, dont sa Maiefté n'auoit parlé que generalement dans la lettre. Il est vray que partie des hommes & de l'argent, dont y est faite mention a esté enuoyée; Mais captieusement M. le Tellier n'y a pas exprimé le temps, d'autant que cela eust fait conoistre que tels secours estoient inutiles, n'ayant esté enuoyez, qu'apres les occasions perduës.

Quelqu'autre qu'un Italien se seroit contenté, que la Reyne luy eut fait l'honneur de publier ce Manifeste pour sa iustification. Le Cardinal veut passer plus outre, il veut poursuiure iusques à la fin un homme qu'il croit auoir offensé. Et comme sa nation est industrieuse à chercher les moyens de se vanger, il en trouua un par lequel il se persuada pouuoir entierement ruiner M. le Marechal de la Mothe, ce fut par vne subornation, qui est la plus honteuse tentatiue qui puisse tomber dans la pensée d'un homme qui fait profession d'honneur, voicy comment. Il y auoit à Paris un Moine appelé l'Abé Sala eschappé des prisons de l'Inquisition de Barcelonne, où il estoit detenu à cause de crimes enormes, & postuloit à la Cour de France par le moyen de M. le Tellier, que par l'autorité du Roy il peust estre restablí en Catalogne & dans la iouissance de son Abaye. Mondit sieur le Tellier, l'ayant reconnu pour un esprit hardy, capable de tout entreprendre contre M. le Marechal de la Mothe, le proposa à M. le Cardinal qui le iugea propre à son dessein, pour auquel paruenir & afin de le mettre en quelque opinion de probité dans l'esprit de la Reyne, il fit encore que ce gallant, quoy que suspendu & interdit, preschast deuant sa Maiefté en Castillan dans l'Eglise des Feuillans. Il auoit auparauant gagné Puiolar lequel de Miquelet où Bandolier estoit deuenu agent de Ca-

atalogne. Ces deux perſonages ſe firent accompagner d'un Moyné Colleſteur des aumosnes de Monferrat; Ils allerent tous trois enſemble à Fontaine-bleau, où ils furent preſentez à la Reyne Regente par M. le Tellier, comme s'ils euſſent eſté deputez ou Ambaſſadeurs de Catalogne: Et en cette qualité l'Abbé fit effrontement à ſa Maieſté en langue Eſpagnole vne harangue remplie de plaintes des Catalans, & en ſuite preſenta vn memorial eſcrit cōtre ledit Seigneur Mareſchal. Ces Calomniateurs iouïrent ſi bien leur ieu en cette occurrence, que dès le ſoir M. le Cardinal fit reſoudre d'arreſter priſonnier M. le Mareſchal de la Mothe, & on publia pour nouuelles par tout que ſur les plaintes des peuples on l'oſtoit de Catalogne & qu'on y enuoyoit en ſa place Monſ. le Comte d'Harcourt Viceroy.

On euſt difficilement deſcouuert cette trahiſon, ſans que peu apres arriuerent en Cour de veritables Ambaſſadeurs du Principat, leſquels eſtonnez d'entendre tels diſcours contraires à leurs inſtructions, qui eſtoient remplies des contentemens que teſmoignoit la Catalogne du gouuernement de M. de la Mothe, iugerent à propos d'eſcrire à Meſſieurs les Deputez, & à Meſſieurs du Conſeil des cent de Barcelonne pour ſçauoir s'ils auoient donné charge à l'Abé Sala & à Puïolar de faire telles plaintes au nom du Principat contre ledit ſieur Mareſchal. Ces Meſſieurs furent ſurpris & touchez de ceſte nouuelle. Ils deſaduouïrent par acte public ceſte impoſture, & manderent à leurs Ambaſſadeurs d'oſter l'agence du Pays à Puïolar: Mais le Cardinal qui ne vouloit abandonner vn homme qui l'auoit ſi vtilement ſeruy, fit dire par Monſieur le Tellier aux Ambaſſadeurs que la Reyne Regente vouloit que ledit Puïolar demeurast Agent: & depuis en recompenſe de ſa calomnie, il a eſté fait Chanoine de Perpignan. Au regard de l'Abé Sala, ſans autre iuſtification le Cardinal le fit par Monſieur le Comte d'Harcourt reſtablir en Catalogne, où depuis les Viceroyſ l'ont protégé par ſon

ordre, contre la iustice de ses Superieurs Ecclesiastiques.

Il sembloit que ceste calomnie descouuerte feroit changer la resolution d'arrester Monsieur le Marechal de la Mothe; mais la passion de Monsieur le Cardinal preualut enfin à la raison. Ledit Marechal fut rappelé de Catalogne, il en sortit avec les regrets & les pleurs des peuples, & en passant à Lyon le iour des Innocens, on l'arresta prisonnier dans le Chasteau de Pierre-Encise. Il auoit eu aduis tres-certain qu'on l'arresteroit là, mais tenant sa conscience entierement nette, il ne fut pas en la puissance de tous ses amis & seruiteurs de l'en empescher: de sorte qu'il vint volontairement se ietter dans les rets, qu'on luy auoit tendus.

Ceste franchise avec laquelle M. le Marechal se rendit prisonnier, meritoit vn plus fauorable traitement, que celui qu'on luy a fait, tant à Lyon qu'à Grenoble; & si les Partisans de Monsieur le Cardinal appellent cela douceur, ils veulent donner au vice le nom de la vertu qui luy est cōtraire. Il y a esté traité avec des rigueurs qui ne sont pas imaginables, il suffit de dire, qu'il a esté gardé à veüe & qu'en veillant ou dormant, il y auoit tousiours trois soldats en garde le chien de la carabine rabatu. M. le Tellier par ordre de M. le Cardinal deffendit de luy donner papier ny encre & qu'on admit aucun à luy parler, son valet de chambre n'auoit permission de le voir qu'au leuer & au coucher. Dans le regne passé, Messieurs les Marechaux de Vitry & de Bassompierre n'ont point esté gardez de la sorte, aucuns ne couchoiēt dans leurs chambres que ceux qu'ils auoient choisis de leurs domestiques, ils estoient visitez avec liberté de tous leurs amis, ils auoient encre & papier & le dernier y a composé des liures. Encore si M. de la Mothe eut esté accusé de quelque crime noir & d'Etat, telle rigueur se pourroit excuser: mais il se void par la Commission adressée au Parlement de Grenoble, que le procez qu'on luy faisoit n'estoit pretexté, que de recher-

che d'argent, pour lequel cas personne n'a iamais esté ainsi obserué, iusques là que Tacite s'estonne que Sejan Ministre de Tibere ne s'agissant que de *repetundis*, au fait de Silius amy de Germanicus, fit au procez *in questione maiestatis*. Cela n'est point aussi l'usage de France. Si Tabouret ou Catelan estoient recherchez pour des millions entiers, dans vne Chambre ardente de Iustice; ils auroient encre & papier & l'accez de leurs amis ne leur seroit pas refusé.

Monsieur le Cardinal ayant mis en seureté la personne de M. le Marechal de la Mothe, il restoit de trouuer vn crime pour colorer la prison d'un homme, qui retournoit glorieux d'un pays, qu'il auoit conserué à la France, par sa conduite & par son espée: la calomnie des trois Catalans desaduouée ne pouuoit plus seruir de pretexte, il y falloit quelques crimes nouveaux. Surquoy son Eminence s'aduisa de donner à M. le Tellier la Commission d'en chercher, c'est vn suiet qui auoit toutes les qualitez qu'il faut pour le faire, il estoit ennemy déclaré de M. de la Mothe, & il possedoit la charge de son parent & amy, duquel il apprehendoit le retour; de plus, ayant esté long-temps Procureur du Roy au Chasteler, il y auoit appris toutes les ruses & chicanes imaginables à bien tourmenter ceux qu'ils entreprendroient.

La modestie deuoit empescher le Cardinal de donner cette Commission à vn homme que le Marechal de la Mothe luy auoit escrit estre son ennemy, & la mesme modestie deuoit empescher l'autre de l'accepter. Neantmoins il le fit, & ioüant de l'espée à deux mains d'Ordonnateur & de Secrétaire d'Estat, il a pratiqué des choses que la posterité s'estonnera auoir esté faites pendant la douceur du regne de la Reyne Regente.

Afin de ne manquer pas, il debuta en sa commission pour ordonner l'emprisonnement de tous ceux qui auoient approché M. le Marechal de la Mothe, ou qui s'estoient meslez de ses affaires iusques au nombre de 25. à 26. Sçauoir, Monsieur de la Vallée homme du Roy, dans l'ar-
mée

l'armée de Catalogne , le Sieur Boifot Intendant & Sec-
 cretaire dudit Seigneur Mareschal , le Sieur Bellestat son
 Aumosnier , le Sieur Raiault son Secretaire , le Sieur David
 son Agent à Paris , & le Sieur du Mas Cavalier de son Re-
 giment , le Sieur Dorée Intendant de l'armée , les Sieurs
 Talon & Moreau , commis de l'extraordinaire de la guer-
 re, avec leurs soubz commis, Colas, des Neus & Briandais,
 la Chapelle domestique dudit Sieur Talon , avec son frere
 nommé la Coupe , vn appellé Donadou Sauuerat Orfeure
 marié & demeurant à Mont-blanc, & les appellés, Jacques
 Oliuier, Fabre, Jean Collier, Martin Fadin, L'Algouazil
 Honeau, Soret, avec Cherard ferrurier Catalan. Et crain-
 te qu'il n'en manquast quelqu'un ; Monsieur le Tellier de-
 creta encore contre Denia Secretaire de Monsieur de la
 Mothe & contre Dormé commis du Sieur Talon qui
 estoient morts, il y auoit long-temps.

On a esté obligé de nōmer cette multitude , d'autant que
 referant simplement le grand nombre de ces prisonniers, le
 sage Lecteur l'eust pris pour hyperbole : ny ayant point d'e-
 xemple dans toutes nos Annales, que pour faire le procès à
 vn seul homme , on ait emprisonné tant de personnes.
 Soubz le Regne de Charles VII. Le duc d'Alençon fut
 iugé, & il ny eut avec luy qu'un Secretaire arresté. Soubz
 Louys XI. l'Herault Mont-ioue & son fils furent seuls pri-
 sonniers avec le Conestable Saint Paul : on n'en remarque
 aucun dans les procès des Mareschaux de Gré & de Biez , &
 de Montmorency : & en celuy du Mareschal de Biron, il n'y
 eut qu'un Secretaire. Barbin avec les Secretaires Ludo-
 uici & Montaubert le furent seuls avec la Mareschale
 d'Ancre ; avec le Mareschal de Marillac il ny eut que trois
 prisonniers qui furent incontinent relaschez. Mais au sub-
 iet de Monsieur le Mareschal de la Mothe , Monsieur le
 Cardinal & Monsieur le Tellier , ont voulu establir cette
 nouuelle Iurisprudence : que pour paruenir à leurs fins ils
 pouuoient indifferemment emprisonner l'Innocent , com-
 me le coupable.

Auec l'Emprisonnement des personnes, les papiers furent pris & tous les biens saisis, scellez & annotés, & des l'instant le tout inuentorié; en Catalogne par Monsieur de Marca, & à Paris par Monsieur le Gras, & par Monsieur le Lieutenant criminel. De plus Monsieur le Tellier au nom du Roy, despescha avec grande actiuité & despense des courriers dans toutes les banques de la Chrestienté, pour sçauoir combien d'argent Monsieur le Marechal de la Mothe y auoit. Escriuit à Monsieur de Marca d'informer en Catalogne contre ledit Seigneur Marechal: & de faire saisir & mettre entre les mains du Roy la Duché de Cardone, duquel ledit Sieur iouïssoit paisiblement en ayant esté inuesty par le feu Roy en recompense d'une bataille gagnée. Action cõtre le droit commun, qui deffend d'oster le bien à vn accusé, auparauant la condamnation: contre les constitutions de Catalogne, qui ne le permettent aux Princes qu'aux seuls cas d'heresie ou de leze Maiesté.

Monsieur de Marca, Visiteur & Intendant de Iustice en Catalogne, suiuant les ordres de Monsieur le Tellier commença à informer, & enuoya incontinent en Cour l'enqueste qu'il en auoit faite: elle fut leuë de Monsieur le Tellier qui la fist supprimer, voyant qu'elle pouuoit plus seruir à canoniser ledit Seigneur Marechal, qu'à luy faire son procez. Il iugea par là, que ledit Sieur de Marca n'estoit pas son homme, & qu'il en falloit trouuer quelque autre, qui fust à tout faire. Il trouua qu'un appelé Chirat, qu'il cognoissoit pour auoir esté son Colleague au Chastelet y estoit propre, il le choisit & l'enuoya en Catalogne avec d'amples memoires pour esplucher entierement la vie de Monsieur le Marechal de la Mothe.

Et affin que le Sieur Chirat ne manquast pas de support dans vn pays incognu où on l'enuoyoit: outre les lettres generales que Monsieur le Tellier en escriuit aux personnes publiques au nom du Roy; Il escriuit particulierement à Monsieur Chabot ennemy de Monsieur de la Mothe, à Gourry son parent Intendant de l'armée, & au Sieur Sain-

de Colombe Marin son allié, d'assister ledit Chirat, & sur tout de faire que les soldats & officiers de l'armée tesmoignassent, Monsieur le Tellier ne fut pas trompé de ses Messieurs. Ils le seruirent tous tres bien. il y a peu de gens dans l'armée qu'ils n'ayent sollicité à déposer contre Monsieur le Marechal de la Mothe: disant aux vns que c'estoit presentemēt vn homme perdu, que l'affaire regardoit Monsieur le Cardinal, & Monsieur le Tellier qui les en reconnoistroient: aux autres ils offroient argent & promettoient employs, & ledit Gourry disoit hautement à tous les officiers de l'armée que s'ils ne deposoient, ils ne toucheroient point d'argent.

Ces Messieurs assistez de l'experience, que Chirat auoit acquise au Chastelet avec Monsieur le Tellier: continuerent la sollicitation qu'ils auoient commencée enuers les gens de guerre & Catalans. Carlier commis de Monsieur le Page à l'extraordinaire & frere d'un Commis, dudit Sieur le Tellier, fournissoit prodigalement l'argent à tous ceux qui se laissoient corrompre; & enfla sur ce pretexte tellement ses parties que ledit sieur le Page, son maistre ne les voulant admettre, il s'en alla à Rome: où Monsieur l'Abbé de la Rochepozay, l'ayant fait arrester prisonnier, les Partisans de Monsieur le Cardinal craignant que cēt incident ne descouurist telles subornations de tesmoins, faicts contre Monsieur le Marechal, le firent mettre en liberté par l'autorité de Monsieur le Cardinal d'Est, qui crut en cela obliger le Cardinal Mazarin. Cet trafic de tesmoignages se faisoit si publiquement en l'armée, & en toute la Catalogne, que lors qu'on eust procedé selon le stile du Parlement de Grenoble, à l'Enqueste iustificatiue; on en eust peu informer comme par tourbe.

Mais sans que les Parents & amis de Monsieur le Marechal de la Mothe se soient empressez de cette enqueste iustificatiue, Dieu l'a faicte par vne occasion impreueüe. Chirat selon les constitutions de Catalogne, auoit pris pour assistant vn Catalan qualifié Docteur Francisch Mar-

ty de Villadamor Menor Aduocat Fiscal de la Ballia-general; hōme de mesme farine que luy, lequel a depuis esté banny de Catalogne & priué de sa charge. Il estoit principal artisan de la coniuration du Bailly de Mataro, confident de la Barone d'Alby, de l'Abbé de Gallicans, & autres malafestis; lesquels auoient entrepris de faire reuolter la Catalogne, en tuant Monsieur le Comte d'Harcourt. Ils furent presque tous executés, & Monsieur le Tellier sauua lors du naufrage ce Docteur, pource qu'il le iugeoit necessaire à instruire le proces de Monsieur le mareschal. Ledit Docteur demeura neantmoins tellement suspect & pour de mauuaises actions qu'il fit depuis, qu'à la poursuite du Procureur fiscal de la Cour du Régent de la Vicairie, le proces luy fust fait & fut condamné. Monsieur le Cardinal & le Tellier afin de le recōpenser du plaisir qu'il leur auoit fait en persecutant Monsieur de la Mothe, l'ont retiré à Paris, & créé Conseiller d'Etat, & fait donner la subsistance par le Roy.

Par les informations sur lesquelles ledit Docteur a esté condamné, il ce voit qu'il a fait déposer cōtre Monsieur le Mareschal vn appelé Boffil en luy promettant 50. liures Catelàs de pēsion sur les secrets de Tortose: qu'il a tenté d'en faire autant à vn nommé Pocuelo Prestre du diocese de Leyde, luy promettant, (disoit-il) par ordre du Vice-Roy, troiscent liures de pension sur les biens confisquez; qu'il offrit vingt doublons à vn appelé André Villar, avec promesse d'vn benefice s'il vouloit déposer: Puiolar s'en mesloit mesme du costé de France, ayant dit au R. P. D. Ioseph parent, Religieux de la Trinité, qui s'en retournoit en Catalogne; que s'il vouloit déposer contre Monsieur le mareschal de la Mothe, il luy feroit donner cinq cens liures de pension. Il se rencontre en ces informations vne particularité estrange laquelle fait paroistre les moyens desquels se sont seruis le Cardinal & le Tellier pour animer la bonté de la Royne Regente, contre Monsieur le Mareschal; que Jacques Alies habitant de Leyde, depose que Chirat & le Docteur Marty l'ont sollicité plusieurs fois avec promesse de

mil escus de pension sur les biens confisquez; moyennant qu'il depost, auoir entendu ledit Seigneur Marechal mal parler de sa Maiesté; adioustant que pour luy persuader ils luy auoient leu la deposition d'un appelé Gerard qu'il leur maintint estre fausse.

Ce n'est pas seulement le Docteur Marty qui s'est sauué pour auoir agy contre Monsieur le Marechal: Augustin Guieno dit & assure qu'on a donné la grace à plusieurs criminels mesme de leze Maiesté au second chef, pour les obliger à deposer: & chose remarquable la plus grand part des mal condamnez estoient ses ennemis; & amis de ceux qui ne l'aimoient pas. Entre les papiers de l'Abbé de Gallicans chef de la coniuration, se trouua vn memoire contre ledit seigneur Marechal apostillé de la main du Docteur Marty: entre les papiers d'Onophré Achil se trouua vne promesse de deux mil pistoles au sieur Chabot son ennemy déclaré; La Baronne d'Alby, André Ferré & le Bailly de Mataro auoient continuellement monopolé contre luy pendant qu'il a esté Vice-Roy.

Ourre les recompenses & les promesses, Chirat & le Docteur Marty ont contraint plusieurs à deposer contre M. le Marechal de la Mothe par l'apprehension de la prison & par la crainte des peines. Ils firent mettre les prisonniers qu'ils iugeoient necessaires à leur dessein; dans les prisons de l'inquisition, qui est la plus austere de toutes celles de Barcelone. Ils commençoient par leur dire que ce n'estoit pas à eux qu'on en vouloit; mais au Marechal de la Mothe seul & qu'incontinent qu'ils auroient depose contre luy on les mettroit en liberté, s'ils ne le faisoient, Chirat les menaçoit, en disant auoir l'autorité du Roy de les faire pendre & rouier: afin de les presser d'auantage il les faisoit mettre dans des cachots plus obscurs les fers aux pieds, & au col: & le porta vn jour à l'excez de battre le Carcelier pource qu'il les traittoit trop doucement. On voyoit dans les informations que Chirat & le Docteur menacerent si hautement de faire donner la Gehenne à vn soldat François appelé Dimas, qui ne vouloit res-

moigner, que ce pauvre homme fit acheter pour deux pistoles de remedes, afin de pouuoir se rendre insensible aux rigueurs de la Torture.

Chirat retourne en France, apres auoir agy de la sorte pendant neuf mois en Catalogne; où depuis Monsieur Fouquet Maistre des Requestes fut renuoyé, afin d'acheuer ce que ledit Chirat y auoit commencé. Mais apres que toutes les Informations dressées par l'un & l'autre eurent esté veuës avec celles qui auoient esté faites à Lyon par Monsieur de Ris, & à Paris par Monsieur le Lieutenant Criminel, on fit lors veritablement voir à Monsieur le Cardinal qu'il n'y auoit pas lieu de poursuiure d'auantage Monsieur le Marechal de la Mothe.

Verité reconnuë, qui sembloit auoir quelque peu adoucy le Cardinal; en ce que rencontrant Mons. d'Houdancourt, Gouverneur de Corbie, il luy dit, comme s'il eust voulu s'excuser des choses passées, qu'il n'auoit aucunement participé à la detention de M. le Marechal son frere. Que veritablement il l'auoit sceuë, & ne l'auoit pas empeschée, attendu que ledit sieur Marechal luy auoit refusé son amitié: que neantmoins celuy qui en estoit cause estant mort il s'emploiroit volontiers pour obtenir sa liberté de la bonté de la Reyne. En suite il permit à mondit sieur d'Houdancourt d'escrire la bonne volonté de S. E. à Mondit sieur le Marechal son frere, auquel à cesuiet il permit auoir encre & papier, afin de faire response & de l'en remercier. Le Marechal escriuit, mais sa lettre n'ayant pas esté trouuée assez explicatiue, M. le Marechal de Villeroy le dit à Monsieur d'Houdancourt: auquel il en bailla vne autre toute faite, laquelle fut enuoyée à Pierre-Encise, & transcrite mot à mot par Monsieur le Marechal, puis renuoyée: & la Cardinal en fut content.

Mais comme il est plus double de tous les hommes, il se persuada que puis que Monsieur le Marechal de la Mothe le discoulpoit luy mesme par cette lettre, de tant de mauuais traitemens qu'il luy auoit fait faire: il ne pouuoit

plus l'accuser des procédures qui se feroient continuées contre luy : il commença aussi à changer de parolle, disant à ceux qui luy parloient de l'affaire de Monsieur le Marechal de la Mothe, qu'il estoit son amy & qu'il le vouloit servir en temps & lieu. Mais qu'il y alloit de l'honneur de la Reyne Regente de faire auparavant cognoistre aux peuples ; que sa Maiesté auoit eu raison d'auoir fait arrester vn homme de sa qualité & de ses seruites : qu'à cette cause, le Conseil du Roy auoit esté d'avis de renuoyer le Procès de Mondit Sieur le Marechal au Parlement de Grenoble.

Le Cardinal & ses Partisans, ont si souuent repeté ce discours, qu'il y alloit de l'honneur de la Reyne, de faire poursuivre le procès de Monsieur le Marechal de la Mothe : qu'on est obligé de leur repliquer, qu'en cela ils estoient tres mauuais Politiques : & que les procédures qu'ils y ont faictes, ont peut-estre plus terny la douceur du regne de la Regence de cette bonne Princesse, qu'aucune autre action qu'ils y ayent commise. Ils deuoient considerer, que l'histoire marque avec plus de soing, les cheutes & les malheurs des grands hommes, que toutes les autres affaires de leur temps, & que les Roys & bons Princes ne les ont iamais poussez iusques à l'extremité, que sur des pretextes specieux de crimes noirs & enormes de lacheté ou de perfidie, dont vne punition exemplaire estoit mesme demandée par la voix publique. Et que si au contraire quelques Souuerains ont poursuivy leurs illustres subiets ; pour des causes foibles comme sont les recherches d'argent ; qui est la querelle d'Alleman, qu'on fait ordinairement à ceux qui ont esté dans des emplois considerables : la posterité a blasmé ceux qui les ont poursuuius, & n'en a pas diminué la gloire des accusez. Le Tacite est plain de telles exemples, & nos Annales fournissent celles du grand Maistre de Montegu, de l'Amiral Chabot, des Marechaux de Gyè, de Biez & de Marillac. Il falloit que la passion du Cardinal fust bien auueglée, de vouloir acquerir cette haute reputation de douceur, en commandant tant de procédures insolites contre

Monſieur le Mareſchal de la Mothe , Viceroy , Illuſtre en toute l'Europe par nombre de batailles , aymé en France pour auoir porté la gloire de la nation iuſques aux entrailles de l'Eſpagne ; & cette perſecution ſeulement fondée ſur le faux pretexte d'un pretendu diuertiffement de quelques ſoixante & dix mil liures , querelle indigne de la colere de la Reyne , & nullement proportionnée aux merites de l'accuſé.

Que ſi les mauuais Conſeils des Miniſtres portent aucune fois les Princes, à faire arreſter des perſonnes de conſideration ; ſi les raiſons en ſont legeres , il eſt de leur honneur de les mettre en liberté , ſans ouyr autre diſcution : Ainſi les cauſes en eſtant inconnues les peuples attribuent le tout à la Juſtice & clemence des Princes ; Que ſi au contraire les Souuerains veuillent publier les motifs qu'ils ont eus, de les arreſter & les mettre en procez: a lors ſi les cauſes en ſont petites , apres que les meſmes peuples les ont penetrée , Ils y apportent leur iugement , & chacun interprete à ſa mode l'action du Prince. Tout conſideré au cas qui ſe preſente , on peut dire avec verité : que la propoſition du Cardinal n'eſt pas ſoutenable qu'avec des gens qui n'entendent pas quel eſt le veritable honneur.

Neantmoins apres que la commiſſion au Parlement de Grenoble euſt eſté expédié à Amiens , & miſe és mains de Monſieur de la Colombiniere Procureur General audit Parlement , mandé expres ; Monſieur le Tellier adiouſta à cette maxime , que l'affaire eſtant venue à ce point ; le dementir n'en pouoit plus demeurer à ſa Maieſté : meſurant par ce beau diſcours l'autorité Royale à l'aune d'un Procureur du Roy au Châſtellet , lequel a ſon honneur veritablement intereſſé lors qu'eſtant pris à partie , il eſt condamné par le Parlement aux deſpens dommages & intereſts d'un accuſé. Il eſt tout autre choſe des perſonnes Royales. Il eſt de leur gloire d'eſtre condamnées lors qu'il s'agit d'une innocence. La plus haute louange que donne Plin à Traian , eſt la differance qu'il met de la Felicité de

son 'regne d'avec celuy des Nerons & Domitianus qu'il auoient immediatement precedé, en ce que de leur temps le Prince gaignoit tousiours sa cause, & que pendant iceluy de ce bon Empereur il estoit presque tousiours condamné.

Ces paroles *le dementir n'en demeurera pas à la Reyne*, prononcee par vn Secretaire d'Estat, & vn Procureur General, intimiderent tellement quelques parens de Monsieur le Marechal de la Mothe: que M. d'Houdancourt son frere demanda pour luy vne abolition: M. le Tellier luy respondit qu'il escriuit à M. le Marechal sçauoir s'il l'agreceroit, & puis qu'il le laissast faire que tout iroit bien. Mondit sieur le Tellier & Monsieur le Cardinal ne demandoient plus que cela, dautant que par vne abolition Monsieur le Marechal se fust rendu coupable, & toutes leur iniques procédures estoient approuuées. Aussi enuoya-t il là dessus à Monsieur son frere vne responce digne d'estre escrite en lettres d'or, qu'estant innocent ils s'estoit rendu volontairement prisonnier, qu'il n'estoit pas resolu de se rendre coupable pour sortir, & qu'il n'achapteroit iamais sa liberté par vne lascheté. Madame la Marechale de Villeroy & Monsieur l'Abbé d'Aisne luy conseillerent souuent; Et Messieurs de la Coste, de la Martilliere, & de la Colombiniere ses Commissaires luy en ont cent fois parlé, allegué des exemples de personnes qualifiées qui n'en auoient point esté deshonorées. Il est tousiours monstre inébranlable à tels conseils & aduis: Il auoit veritablement raison, de ne laisser point de tache à vne si belle vie que la sienne. Ce refus de prendre abolition, fut cause qu'on le transporta de Pierre-Encise à Grenoble, conduit par les Preuosts & Archers de Dauphiné, Lyonnois, Forests, Beauuolois avec telle rigueur, qu'en plein midy on apportoit de la chandelle en fermant les fenestres de sa chambre.

On ne parle point icy de la procedure sans exemple contre vn Viceroy, ny de la nullité de la Commission

adressée au Parlement de Grenoble, au préjudice de celui de Paris, qui seul peut connoistre les Ducs & Officiers de la Couronne, pource que cela est entierement prouué au premier Factum. On ne parle non plus de ce qu'en tout cas le Parlement de Grenoble en deuoit connoistre Chambres assemblees, & non la troisieme seulement avec six autres Iuges, comme il estoit porté par certaines Lettres Patentes du dernier Decembre mil six cens quarante-sept, ny des violentes, iniustes & extraordinaires poursuites du Procureur General, dautant que tout cela est dans le troisieme Factum. Ny aussi de ce qui regarde la iustification de mondit seigneur le Marechal, estant parfaitement bien déduite dans le quatriesme. Il suffit de représenter en cettuy-cy ce qui n'est pas dans les precedens.

Messieurs du Parlement de Grenoble, ayant du consentement du Procureur General renuoyé au Conseil du Roy, iuger l'opposition formée à l'exécution desdites Lettres du dernier Decembre, & pour ce deliuré Commission, afin d'y appeller ledit sieur Procureur General au mois. Monsieur le Tellier auant l'assignation escheuë, enuoya vn Arrest du Conseil d'enhaut, portant cassation de ladite opposition, qu'il disoit contraire à l'usage dudit Parlement; lequel estant mieux instruit de ses coutumes que ledit sieur le Tellier, fit à cette occasion au Roy des remonstrances par escrit, lesquelles furent enuoyées à Monsieur le Chancelier; & donnerent suiet à d'autres Lettres Patentes semblables aux premieres, non adressées au Parlement, mais seulement à la premiere Chambre, laquelle ayant esté contrainte de les enregistrer, fit mettre sur le registre que telles Lettres ne pourroient iamais tirer à consequence, qui est la modification ordinaire qu'apportent les Parlemens aux violences des temps.

Et ce qui estonna le plus mesdits sieurs du Parlement fut des Lettres de cachet, que leur enuoya Monsieur le Tel-

lier : par lesquelles le Roy reconnoissoit, que toutes les choses extraordinaires qu'ils auoient veu faire à M. le Procureur general dans la suite de l'affaire du Marechal de la Mothe, estoient par les ordres exprez que sa Maiesté luy en auoit donnez. Ainsi que le Roy approuuoit les menaces de Semestres, de venians, & d'interdictions, mesme que dans cette approbation generale pouuoit estre comprise vne fausseté, dont M. l'Euesque de Rennes leur auoit fait plainte.

Ce n'est pastout, M. le Cardinal voulant oster à Monsieur le Marechal de la Mothe tous moyens de se deffendre; fit donner Arrest au Conseil d'en haut signé le Tellier; par lequel il estoit deffendu au sieur de Laborye son Aduocat, & à tout autre d'agir pour luy : avec deffences à tous Greffiers, de luy deliurer aucuns actes. Cét Arrest quoy que contre le droit des gens, & contre la pieté Chrestienne, qui commande de secourir les affligez & prisonniers, fut signifié audit Aduocat & Greffiers par vn Huissier du Conseil, Marque certaine à la posterité de la Iustice qui a esté pratiquée en France pendant le ministere du Cardinal.

De plus M. le Cardinal par lettres de chachet, signées le Tellier : fit faire commandement à Monsieur l'Euesque de Rennes de sortir de Grenoble où il sollicitoit alors le procez de Monsieur son Frere, ledit Seigneur se trouuant malade s'en excusa, & l'escriuit à sa Maiesté, mais mondit sieur le Cardinal ne pouuant admettre ses excuses, enuoya le sieur de Primaudaye Gentil-homme Huguenot, pour le faire obeir de gré ou de force, avec ordre de l'accompagner iusques à son Diocese. Digne choix de Son Eminence, qui apprehendoit qu'un Catholique n'eut peur-estre eu trop de respects enuers la personne sacrée d'un Euesque. Enfin ce Gentil-homme, quoy que de religion contraire, le trouuant effectiuement malade, ne iugea à propos de le contraindre à se mettre en chemin: Il le manda à la Cour par vn Courrier exprez; lequel rap-

porta nouuel ordre à Monsieur le Duc de Lesdiguières, de mettre Monsieur l'Euesque de Rennes hors de Grenoble sain ou malade, ce que mondit sieur le Duc fit exactement executer: Monsieur l'Euesque de Rennes, ayant esté contraint de se mettre dans vn brancard iusques à Lyon, où il fut plus de deux mois auant que de pouuoir reprendre sa santé.

Peut-il y auoir au monde vne rigueur semblable, à celle d'empescher vn frere de prendre le soin de deffendre, & de solliciter pour vn frere prisonnier & affligé. Tibere le plus subtil Prince qui fut iamais pour faire condamner les hommes selon les formalitez de Iustice, laissoit cette liberté aux parents des accusez. Et le Roy Henry IV. ayeul du Roy, le plus clement Prince de nostre siècle; obligeoit mesme les parents à ces deuoirs de pieté, ayant dit aux parents du Marechal de Biron qui prioient sa Maiesté de leur permettre. *Que les deuoirs de nature ne se demandoient point à la grace du Prince, que c'estoit chose à laquelle ils estoient obligez. Et qu'il seroit bien aise que leurs sollicitations operassent en sorte que le Marechal peust estre absous.* Voila des termes dignes d'un Monarque Chrestien, bien esloignez de ceux que le Cardinal, & le Tellier ont fait pratiquer en cette occurrence au Roy son petit fils.

La troisieme Chambre du Parlement de Grenoble, ainsi establie; Monsieur le Tellier donna ordre au Procureur general de faire changer la procedure, à ce que les Sieurs Dorée, Talon & Moreau: Interrogez comme complices à Paris par Monsieur le Lieutenant Criminel à Perpignan par Monsi. Fouget & Chirat, & par mesdits Sieurs les Commissaires à Pierre-Encise, & à Larsenal, fussent seulement ouys comme tesmoins; Ledit sieur Procureur general l'executa ponctuellement, encore que ce soit procedure non receuë en France, Berault en sa pratique Criminelle l'appelle *iniustice damnable*. Neantmoins sur icelles Monsieur le Procureur general s'hazarde de
presenter

presenter requeste à la troisieme Chambre à ce que le procez de M. de la Mothe fut réglé à l'extraordinaire par recollemens & confrontations de tesmoins

Il se persuadoit faire passer l'affaire à la vollée de bonnet sans discussion: mais il trouua des Iuges incorruptibles qui vouloient voir les charges sur le Bureau; elles furent entierement leuës & examinées, & apres la lecture, on remarqua sur le visage de tous Messieurs vn estonnement de voir qu'on eut entrepris vn homme de la qualité & des seruices de Monsieur de la Mothe sur si peu de preuues.

Il y eut quelques-vns de Messieurs, qui sur les seules charges, opinerent à vn hors de Cour & de Procez. La formalité l'emporta: & fut dit, que dans quinzaine Mons. le Marechal feroit iuger ses appellations: Monsieur le Procureur General fit le possible pour empescher cét Arrest. Il en vint iusques aux anciennes menaces, qui se peuuent voir dans le Verbal que le Parlement à fait dresser de cette affaire. Il fit les mesmes boutades représentées au troisieme Factum, pour empescher que la Requeste du sieur Boisot ne fut receue. Procedures trouuées si mauuaises de tout le monde, que ses meilleurs amis luy conseillant d'y aller plus modestement. Il leur repliqua naïuement, que voulez-vous que ie face, ie sçais bien que tout cela ne vaut rien: mais j'en ay ordre de Messieurs les Ministres.

Et en tout le procez, Monsieur le Cardinal & Monsieur le Tellier, n'ont rien tant apprehédé que de voir plaider les appellations de telles procedures dans l'Audience publique d'un Parlement. Aussi pour l'empescher, Monsieur le Procureur General entra dās la Chambre, & dit qu'il auoit receu commandement de sa Maiesté, de suspendre l'instruction du procez de Monsieur le Marechal, iusques à nouvel ordre. Ce qui n'empescha toute fois que sur la requeste de Monsieur le Commandeur de la Mothe, il ne fut ordonné que Mons. le Marechal son frere, choisiroit Aduocat & Conseil, pour en execution de l'Arrest venir plaider sesdites appellations, & que le Sieur Baudet premier Greffier, se

transporteroit à l'Arſenal, afin de ſçauoir la volôté dud. Seigneur Mareſchal. Monſieur le Procureur General, voyant que ce luy eſtoit vn coup d'Eſtat, pour agreer à Monſieur le Cardinal, & à M. le Tellier, fit que le Lieutenant de M. le Duc de Leſdiguières empêcha formellement deux fois le greffier de ſignifier l'Arreſt de la Cour à mondit ſieur le Mareſchal. Et afin que l'autorité du Parlement ne preuaſt vn matin lors qu'on y ſongeoit le moins on fut enleuer de Grenoble, M. le Mareſchal comme ſi c'eût eſté vn voleur, par des Archers & Preuoſts, qui le remenerent en ſon ancienne priſon de Pierre-Enciſe. Le Parlement voyant les refus faits à ſon Greffier, & qu'à ſon inſceu, on auoit enleué ſon priſonnier, en fit informer; & eſcriuit au Roy ſur cét attentat fait à ſa Juſtice: il n'eut en cela autre ſatisfaction, ſi non que Monſieur le Tellier eſcriuit que c'eſtoit par les ordres de ſa Maieſté.

Les vacations toſt apres ſuruenûes, arreſterent le cours des plaintes de ce Parlement, lequel ſans auoir eſgard ny aux promeſſes ny aux menaces de la Cour, a teſmoigné dans la longue ſuite de cette affaire tant de generoſité pour ſouſtenir en juſtice vn homme de qualité iniquement entrepris. Que ſa probité peut à l'aduenir ſeruir d'exemples aux Iuges, que les fauoris & miniſtres des Roys vouldront choiſir pour executeurs de leurs paſſions.

Sortant ainſi de Grenoble, M. le Mareſchal de la Mothe, ne creut plus r'auoir ſa liberté par la voye de la Juſtice: ſe voyant remis ſous la tyrannie de Monſieur le Cardinal & du Tellier, il ne l'eſperoit plus qu'à la maiorité du Roy, ſes amis en apprehendoient le pareil traitement qui fut fait à M. Barillon: lors que Dieu prenant pitié de tant de peuples affligés en ce Royaume, donna l'Eſprit de reſolution à Meſſieurs du Parlement de Paris, pour interrompre le cours des deſordres qui y regnoient.

Ils obtinrent la reuoqation des Commiſſions extraordinaires, avec la ſeureté publique des perſonnes. En ſuite tous les pretendus priſonniers d'Eſtat furent élargis, &

Monsieur le Marechal eut le bon-heur d'estre du nombre. Il s'en tient tellement obligé à Messieurs du Parlement, qu'en l'occasion presente, il leur est venu offrir cette liberté qui luy auoient moyennée, afin de l'employer avec eux au reestablissement de la France.

A lors que par le moyen de Messieurs du Parlement de Paris, les prisons s'ouuroient à tout le monde ; Monsieur le Cardinal eut encore l'artifice de vouloir faire croire à Monsieur le Marechal de la Mothe, que sa liberté luy estoit donnée par son moyen : il luy en fit faire compliment à Pierre Encise, par vn sien Gentil-homme, luy promettant de s'y'employer, le Marechal l'en remercia aussi par lettres, & tesmoigna luy en auoir obligation. Et c'est volontiers sur le fondement de telles lettres respectueuses escrites en prison, que le Cardinal veut establir sa vanité depretendu douceur.

On void au present factum comme cette obligeante vertu a peu paru dans toutes les procedures de M. le Cardinal, lesquelles ont esté si violentes, que si les Iuges eussent suiuy les sentimens, dits & escrits par M. le Tellier ; M. le Marechal ne seroit plus en estat de seruir son pays. Mondit sieur le Tellier tenoit sa ruine si asseurée, que voulant auoir part à ses despouilles, il demembra le Marquisat de Paillas du Duché de Cardonne pour en gratifier le sieur de Fimarcon Tilladet son allié. Que si Messieurs du Parlement de Paris traittoient à present le Cardinal, le Tellier, & leurs adherans de la sorte, difficilement leur innocence se trouueroit-elle à l'espreuue qu'à esté celle de Monsieur le Marechal de la Mothe : Iamais il n'y a eu passion si visible que celle qu'ils ont fait paroistre pour rendre ce Gentil-homme mal-heureux, iusques à preiudicier au seruice du Roy. Il auoit tousiours heureusement seruy la France, iusques au commencement de leur Ministeriat. Et on peut dire qu'il a tousiours si noblement, & si genereusement fait la guerre, & si equitablement gouverné des peuples Estrangers nouuellement soubmis, que nonobstant leur

iniustes procedures, l'Histoire ne laissera pas quelqueiour,
de former sur luy, l'Idée, & le Model d'un Viceroy, &
Lieutenant General d'un Monarque conquerant.

F I N.